



I.ERANSKINA

ARTE ESZENIKO ETA MUSIKALETAN TREBATZEKO EKINTZETARAKO LAGUNTZEN 2022KO DEIALDIA

1.artikulua. Xedea

Deialdi honen xedea da pertsona fisikoei dirulaguntzak ematea, arte eszenikoen (dantza, antzerkia, zirkua eta mimoa) eta musikalen arloetako banakako espezializazio trebakuntza sustatzeko, hain zuzen ere toki hauetan egiten dena: unibertsitateak, goi eskolak, nazioarteko eskolak, goi mailako kontserbatorioak, dantza eskolak, antzerki eskolak, zirku eskolak eta, oro har, artearen arloko trebakuntza zentroak.

Berariaz kanpoan uzten dira oinarrizko prestakuntzako ikasketa arautuei lotutako proiektuak edo eszenaratzea edo muntaia dakartenak.

Deialdi hau Kultura eta Kirol Sailaren norgehiagoka bidezko dirulaguntzak emateko oinarri arautzaileak onetsi zituen Foru Gobernu Kontseiluaren azaroaren 12ko 50/2019 Foru Dekretuak eta haren ondoko aldaketek arautzen dute.

2.artikulua. Laguntzak emateko prozedura

Laguntzak norgehiagoka bidez emango dira.

3.artikulua. Aurrekontu egozpena

Laguntza hauek emateko aurrekontu muga 20.000 eurokoa da, eta gastua Arabako Foru Aldundiaren 2022ko gastuen aurrekontuko 70105.G/334700/48000702 “Bekak: arte trebakuntza eta sorkuntza” izeneko partidaren kontura egingo da.

4.artikulua. Laguntza motak eta gehieneko zenbatekoak

Deialdi honek laguntza mota hauek hartzen ditu barnean, zenbatekoari eta gauzatze tokiari dagokienez:

Tokia	Zuzkidura, eurotan
Atzerrian egin beharreko espezializazioa	5.000
Euskal Autonomia Erkidegotik kanpo eta Estatuaren barruan egin beharreko espezializazioa	3.000

Laguntzak emango dira 2022. urtearen barruan egingo diren 250 ordutik gorako trebakuntza espezializatuko proiektuetarako.

5.artikulua. Onuradunak eta baldintzak

Deialdi honetako dirulaguntzak pertsona fisikoek eskatu ahalko dituzte, ezaugarri hauek betetzen bazituzten 2022ko urtarrilaren 1ean:

- 18 urte beteta eta 30 urte bete gabe izatea.
- Azken hiru urteetan etenik gabe errolatuta egon izana Arabako Lurralde Historikoko edo



Trebiñuko enklabeko edozein udalerritan. Salbuespen bakarra onartuko da: erroldan baja eman izana laguntza eskaeraren xedea den trebakuntza jasotzeko tokira joan behar izateagatik; egoera hori agirien bidez egiaztatu beharko da.

Ezin daitezke laguntza hauen onuradun izan Arabako Foru Aldundiak sustatutako laguntzen aurreko bi deialditan espezialitate edo arlo berbererako laguntza jaso dutenak.

Halaber, ezin daitezke laguntza hauen onuradun izan Arabako Lurralde Historikoaren Dirulaguntzei buruzko urriaren 19ko 11/2016 Foru Arauak 12.2. artikuluan jasotako egoeretakoren batean daudenak.

6.artikulua. Eskaerak eta aurkeztu beharreko agiriak

Laguntza hauek eskuratzeko interesa duten pertsonak ondoko agiri hauek aurkeztu beharko dituzte, idatziz edo irudiz hizkuntza ez-sexista erabiliz:

- a) Eskaera, II. eranskin moduan argitaratzen den ereduaren arabera.
- b) NANaren fotokopia.
- c) Azken hiru urteetan Arabako Lurralde Historikoko edo Trebiñuko enklabeko edozein udalerritan etenik gabe erroldatuta egon dela adierazten duen ziurtagiria.
- d) Laguntza eskatzen duen pertsonaren curriculum vitae-a, eskaeraren xede den jakintza arloko trebakuntza eta espezializazioari eta esperientziari buruzko egiaztagiri egokiak erantsita.
Zerrendatu bai baina agiririk erantsi ez zaien ekintzak ez dira kontuan hartuko.
- e) Garatu beharreko trebakuntza proiektuaren azalpen memoria.
- f) Laguntza eskaeraren xedea den trebakuntzan onartua izan dela dioen ziurtagiria.
- g) Proiektua egin nahi den herrialdeko hizkuntzaren behar besteko ezagutza —elkarrizketa mailan— duela egiaztatzen duen agiria, baldin atzerrian egiten bada eta hizkuntza ofiziala ez bada Euskal Autonomia Erkidegoan berezko hizkuntza gisa onartuta daudenetako bat.

Eskatzaileek emandako datuak Arabako Foru Aldundiak tratatuko ditu eta “Kultura sustapena”ren tratamenduetara sartuko dira, Arabako Lurralde Historikoan kultura jarduera sustatzeko. Datu pertsonalen tratamenduan honako hauetan ezartzen dena aplikatuko da: batetik, datu pertsonalak babesteari eta eskubide digitalak bermatzeari buruzko abenduaren 5eko 3/2018 Lege Organikoa; bestetik, Europako Parlamentuaren eta Kontseiluaren 2016ko apirilaren 27ko 2016/679 (EB) Erregelamendua, pertsona fisikoak babestekoa dena datu pertsonalak tratatzeari eta datuen zirkulazio libreari dagokionez.

7.artikulua. Eskaerak aurkeztea eta epea

1. Eskaerak, 6. artikuluan eskatutako agiriekin batera, toki hauetakoren batean aurkeztu behar dira:

- Arabako Foru Aldundiaren Erregistro Orokorrean.
- Gasteiz, Guardia eta Laudioko Ogasunaren bulegoen erregistroan.
- Arabako Foru Aldundiaren egoitza elektronikoa. Aurkezpen telematikoa aukeratzen bada, berariazko izapide irisgarriaren bidez egin beharko da, egoitza elektronikoaren bidez.
- Administrazio Publikoen Administrazio Prozedura Erkidearen urriaren 1eko 39/2015 Legeak 16.4 artikuluan ezarritako gainerako erregistroetatik edozeinetan.

2. Eskaerak aurkezteko hogeita hamar egun naturaleko epea egongo da oinarri hauek ALHAOn argitaratu eta hurrengo egunetik aurrera kontatuta.



3. Eskerak forma egokian aurkeztu ezean, edo deialdi honetan eskatutako agiriren bat falta bada, errekerimendua egingo zaio interesdunari hamar eguneko epean falta diren datuak eta agiriak aurkezteko. Adierazi den epean hala egiten ez badu, bere eskaerari uko egiten diola iritziko da, eta artxibatu egingo da, dagokion ebazpena eman ondoren. Pertsona berak deialdi honetan bideratutako laguntza bakarra eskatu ahal izango du.

8.artikulua. Prozedura izapidetzea eta balioespen irizpideak

Arabako Foru Aldundiko Kultura eta Kirol Saileko Kultura Ekintza Zerbitzua izango da prozedura izapidetzeko organo eskuduna.

Hauek izango dira balioespen irizpideak:

- a) Eskatzailearen curriculum vitae-a: 70 puntu, gehienez ere, honela banaturik:
 - 30 puntu, gehienez ere: laguntza eskaeraren xedea den arloko trebakuntzaren balioespena.
 - 40 puntu, gehienez ere: laguntza eskaeraren xedea den arloko esperientziaren eta hartan egindako jardueren balioespena.
- b) Egingai den proiektuaren interesa: 30 puntu emango dira, gehienez ere.

9.artikulua. Ebazpena eta jakinarazpena

1. Balioespen batzorde batek egingo du laguntzak emateko proposamena. Batzorde hori osatzeko, kontuan hartuko da Emakumeen eta Gizonen berdintasunerako otsailaren 18ko 4/2005 Legeak 3.7 artikuluan ezarritakoa. Hortaz, honako kide hauek izango ditu:

- Batzordeburua: Kultura zuzendaria edo hark eskuordetutako pertsona.
- Batzordekideak: Kultura Ekintza Zerbitzuaren burua eta Kultura Zuzendaritzari atxikitako teknikari bat.
- Idazkaria: Kultura eta Kirol Saileko Idazkaritza Teknikoko Zerbitzuko teknikari bat, hizpidea izango duena baina hautespiderik ez.

2. Balio-iritzi baten mende dauden irizpideei dagokienez, eskaerak ebaluatzeko, Balorazio Batzordeak aditu profesional independenteen partaidetza izan ahal izango du. Aditu horiek erantzukizunpeko adierazpena aurkeztu beharko dute, Sektore Publikoaren Araubide Juridikoaren urriaren 1eko 40/2015 Legean aurreikusitako abstentzio-arrazoietan sartuta ez daudela adierazteko, konfidentzialtasuna bermatzeko, emandako dokumentazioa deialdiaz bestelako helburu baterako ez erabiltzeko, eta proiektuak balioesteko erabakia eman ondoren, suntsitu edo itzuli, jatorrizkoak badira, espedienteen dokumentazio guztia prozeduraren instrukzio-organismoari. Izendapen horiek Kultura eta Kirol Saileko diputatu titularren ebazpen bidez onartuko dira. Ebazpen hori ALHAOn argitaratuko da, edozein interesdunek errefusatzeko eskubidea erabil dezan, lege ezarritako kasu eta baldintzetan.

3. Batzorde horrek, aurkeztutako eskaeren balioespena ikusita, beka hauek guztiz edo partzialki esleitu gabe uztea proposa dezake.

Balioespen Batzordeak txosten bat egingo du, non jasoko baita onuradun izateko baldintzak betetzen dituzten eskaera guztien zerrenda ordenatua. Zerrenda hori erabiliko da onuradunek emandako laguntzari uko egiten badiote edo laguntza onartzen ez badute.



Baldin eta laguntza jaso dezakeen azken eskatzaileari ezin bazaio gehieneko dirulaguntza eman esleipen nahikorik ez dagoelako, esleitu daitekeen gainerako zenbatekoaz lagunduko da diruz.

Merezimenduetan berdinketa badago, lehentasuna izango dute azken hiru ekitaldietan sail honen laguntzarik jaso ez duten pertsonak aurkeztutako eskaerak.

4. Deialdi honetako beken emakida Kultura eta Kirol Saileko diputatuaren foru agindu baten bidez ebatziko da, ikusita zer dioen Balioespen Batzordearen txostenak, eta onuradunei haren berri emango zaie, Administrazio Publikoen Administrazio Prozedura Erkidearen urriaren 1eko 39/2015 Legeak 42. eta 43. artikuluetan xedatutakoaren arabera.

Ebazpenak administrazio bidea amaitzen du. Beraz, Administrazioarekiko Auzietarako Jurisdikzioa arautzen duen uztailaren 13ko 29/1998 Legeak 46.1 artikuluan xedatutakoari jarraituz, haren aurka administrazioarekiko auzi errekurtsua aurkeztu ahal izango da, administrazioarekiko auzietarako kasuan kasuko epaitegietan. Horretarako, bi hilabete izango dira, ebazpena jakinarazi eta hurrengo egunetik aurrera.

Zuzenean aurkaratu ezean, nahi izanez gero, errekurtsua aurkeztu ahal izango da ebazpena eman duen organoan, hilabeteko epean, jakinarazpena jaso ondorengo egunetik aurrera, bat etorritz Administrazio Publikoen Administrazio Prozedura Erkidearen urriaren 1eko 39/2015 Legeak 123. artikuluan xedatutakoarekin.

Beka eskaerak gehienez ere sei hilabeteko epean ebatziko dira, deialdia ALHAOn argitaratu eta hurrengo egunetik aurrera. Epe hori igaro eta esanbidezko ebazpenik eman ez bada, ulertuko da eskaerari ezezkoa eman zaiola, nahiz eta ondoren ebazpena eman ahal izango den.

10.artikulua. Laguntza ordaintzea

Laguntzari dagokion PFEZaren atxikipena egingo zaio, eta ordainketa honela egingo da:

- a) Zenbatekoaren ehuneko 70a, laguntza ematen den unetik aurrera.
- b) Gainerako ehuneko 30a, gauzatutako proiektuari buruzko memoria aurkezten denean.

11.artikulua. Laguntzen onuradunen betebeharrak

Beka hauek jasotzeko eskabideak aurkezteak esan nahi du oinarri hauetan ezarritako arauak berariaz eta baldintzarik gabe onartzen direla. Gainera, onuradunen betebeharrak dira honako hauek:

- a) Arabako Lurralde Historikoaren Dirulaguntzei buruzko urriaren 19ko 11/2016 Foru Arauak 13. artikuluan izaera orokorrean ezarritako betebeharrak bete behar dituzte onuradunek.
- b) Euskal Autonomia Erkidegoko Emakumeen eta Gizonen Berdintasunerako 4/2005 Legean eta Emakumeen eta Gizonen Berdintasun Eragingarrirako 3/2007 Lege Organikoan jasotako printzipioak eta betebeharrak bete behar dira.
- c) Berariaz onartu behar da emandako laguntza, hura emateko jakinarazpena jasotzen denetik hamabost egun baldin deneko epean. Epe horretan laguntza onartzen ez bada, ukatutzat joko da.
- d) 2022ko abenduaren 9ra arteko epea izango dute egindako lanari buruzko amaierako memoria aurkezteko. Horren barruan, besteak beste, proiektuaren zuzendaritzaren ardura duen pertsonak edo erakundeak emandako asistentzia ziurtagiria jaso beharko da, proiektuak irauten duen



ordu kopurua adierazten duena, eta baita pertsona edo erakunde horrek emandako ebaluazio ziurtagiri bat ere.

- e) Egindako jardueri buruzko datuak eta agiriak eman behar dituzte, Kultura eta Kirol Sailak hala eskatzen dienean. Era berean, Ogasun, Finantza eta Aurrekontu Sailak, Kontuen Epaitegiak edo beste erakunde eskudun batzuek eskatutako informazioa ere emango dute.
- f) Onuradun guztiek konpromisoa hartzen dute bekaren gaiari buruzko kontzertu, ekitaldi eta abarretan profesionalki parte hartzeko, gutxienez behin eta aldez aurretik Foru Aldundiarekin adostuta, inolako ordainsaririk jaso gabe.

12.artikulua. Agiriak itzultzea

Eskatzaileek aukera izango dute aurkeztutako agiriak jasotzeko, eskaera salbu, laguntzen ebazpena jakinarazten denetik aurrera, hilabeteko epean; nolahi ere, onuradunek ezingo dituzte aurkeztutako agiriak jaso, espedientera sartuko baitira. Ezarritako epea igaro ondoren, Kultura eta Kirol Sailean aurkeztutako eta jaso gabeko agiriak suntsitu egingo dira.

13.artikulua. Bateriaezintasunak

Deialdi honetako laguntzak bateragarriak dira proiektu bererako jaso daitezkeen beste batzuekin, bai eta interesduna edozein erakunde, korporazio, pertsona publiko edo pertsona pribaturekin lotzen duen kontratu edo estatutu bidezko lotura dakarten soldatak eta zerbitzu sariak jasotzearekin ere. Dena den, laguntza hau eman aurretik, inguruabar horien berri eman eta berariazko baimena eskatu behar zaio Kultura Zuzendaritzari.

14.artikulua. Dirulaguntza itzultzea

Esleitutako dirulaguntzak itzuli egin beharko dira Arabako Lurralde Historikoaren Dirulaguntzei buruzko urriaren 19ko 11/2016 Foru Arauak ezarritako kasuetan.

Onetsitako dirulaguntzaren kontura jasotako kopuruen itzulketa zuzenbide publikoko diru sarreratzat hartuko da eta haren kobrantza Ekonomia eta Aurrekontu Araubidearen abenduaren 18ko 53/1992 Foru Arauak II. tituluko I. kapituluan aurreikusten duenarekin bat etorritik egingo da.

15.artikulua. Interpretazioa

Oinarri hauek interpretatzerakoan zalantzaren bat sortuz gero, Arabako Foru Aldundiaren Kultura eta Kirol Sailak ebatziko du.

16.artikulua. Publizitatea

Deialdi hau ALHAOn argitaratuko da. Halaber, www.araba.eus eta www.kulturaraba.eus/es/ web orrien bidez ere zabalduko da.

17.artikulua. Azken klausula

Oinarri hauetan xedatuta ez dagoen guztian, honako hauei jarraituko zaie: urriaren 19ko 11/2016 Foru Araua, Arabako Lurralde Historikoaren Dirulaguntzena; abenduaren 18ko 53/1992 Foru Araua, Arabako Lurralde Historikoko Ekonomia eta Aurrekontu Araubidearena; Aurrekontua Egikaritzeko Foru Araua, indarrean dagoena; urriaren 1eko 39/2015 Legea, Administrazio Publikoen Administrazio Prozedura Erkidearena; 3/2007 Lege Organikoa, Gizonen eta Emakumeen Berdintasun Eragingarriakoa; 4/2005 Legea, Euskal Autonomia Erkidegoko Emakume eta Gizonen Berdintasunerako, eta aplikatzeko den gainerako araudia.